

四庫全書

集部

欽定四庫全書

集部

樊榭山房集卷二

詳校官侍郎

臣謝墉

助教

臣常循覆勘

總校官庶吉士

臣朱

鈔

校對官中書

臣程

琰

謄錄進士

臣沙

重輪

欽定四庫全書

集部七

樊榭山房集

別集類六

國朝

提要

臣等謹案樊榭山房集十卷續集十卷

國朝厲鶚撰鶚字太鴻錢塘人康熙庚子舉人  
乾隆元年嘗薦舉博學鴻詞所居取唐皮日  
休句題曰樊榭山房因以名集生平博洽羣  
書尤熟於宋事嘗撰宋詩紀事一百卷南宋

院畫錄八卷東城雜記二卷又與同社作南宋雜事詩七卷皆考證詳明足以傳後其詩則吐屬嫺雅有修潔自喜之致絕不染南宋江湖末派雖才力富健尚未能與朱彝尊等抗行而恬吟密咏綽有餘思視

國初西泠十子則翛然遠矣是書前集詩分甲乙丙丁戊己庚辛八卷詞分甲乙二卷為康熙甲午至乾隆己未之作續集亦詩八卷而

以北樂府一卷小令一卷附焉則己未至辛未作也乾隆四十四年十一月恭校上

總纂官臣紀昀臣陸錫熊臣孫士毅

總校官臣陸費墀



樊榭山房集原序

昔唐楊綰為文恥於自白非知己不可得而見而魏丁敬禮嘗求人定其文夫恥於自白者自珍其文者也求定其文者自疑其文者也僕少好篇詠晚頗知難三十年以來所作隨手棄斥存篋中者僅十之二三暇日編次古今體詩為八卷長短句二卷譬之山謠村笛雖無當於鍾呂之響而向來所閱閒居羈旅怡愉憂悴歷歷在目每一開視聊以省憶生平竊亦自珍自疑願與審

音者共定之外有雜文若干卷叢綴若干卷將次第排  
續焉得毋蹈詭符之誚耶乾隆四年三月朔錢塘厲  
鶚自序

樊榭山房集原序



欽定四庫全書

樊榭山房集卷一

錢塘厲鶚撰

詩甲

金壽門見示所藏唐景龍觀鐘銘拓本

以下  
甲午

嗜古金夫子貪若籠面貨墨本爛古色不受寒具浣便  
續金石錄明誠不是過鐘銘最後得斑駁豈敢唾照眼  
三百字字字蟠螭大撫迹思景雲往事去無那初翦桑

條韋柘袍受朝賀范鐘崇玉清構炭飛廉佐九乳器未  
亡雄詞壓寒餓裝比李仙丹徵句迭倡和虛無奚足稱  
懋績於此墮吾思景鐘銘天筆濫傳播

游無門洞

陰竇絕曦景石雨垂癡龍白雲嬾不收繚繞東岳松定  
僧涌壁像海衆驚靈蹤藤花拂又落暝聞烟際鐘

擬古二首

我我崑崙山鬱鬱環剛樹仙人散綠髮正陽無風雨彈

我白雪琴高邱哀無女苟得一心人聊以結衷素

美人生南國纖手工織紵或為繞梁歌當窗揚清音色  
麗奪華燭情絲閒錦衾戒旦上蘭皋亭午眺青林采葛  
知心苦激漂能自沈不為懷春意誰識空閨心

花塢二首

法華山西山翠深松篁蒙密自成陰團瓢更在雲深處  
惟有樵風引磬音

白練鳥從深竹飛春泉淨綠上人衣分明盂尉投金瀨

吟到日斜猶未歸

牧童詞擬張司業

主人授我烏牸牛為言主人百不憂朝逐水草暮歸宿  
不使飛蠶傷牛目牽牛且向南陂嬉不知牛腹飽與飢  
一朝牛病逃鞭笞主人自能問牛醫

觀汪青渠所藏嵩山諸碑版拓本六首

漢啓母廟石闕銘

開母化為石其事本荒誕何年六六峰石闕字漫漶

東魏嵩陽寺碑

運歸賀六渾悲吟後漢書可憐嵩陽寺顛屬劫灰餘

秦王賜少林寺主敎

逆豎德充符一千思驅羊當時殲除力何以資空王

天后夏日游石淙詩

金輪昔垂衣暄暑平樂澗仙巖類削成幾人侍游讌

唐裴灌少林寺碑

傳聞三花樹香雨徧諸天何日持茗帚心空初祖禪

唐尉遲汾嵩山靈勝詩

名嶽鎮中畿靈異紛不一欲從劉根游吾其采芝朮

秋夜宿葛嶺涵青精舍二首

笑看圓月上前峰塔影微瀾卧玉龍林際窺人太無夢  
好風吹送隔湖鐘

書燈佛火影清涼夜上層樓看海光蕉飈暗廊蟲弔月  
無人知是半間堂

晚秋寄楊揚山

半籬柿葉擁堦除又見臯蘭即漸疎  
水減舊痕魚上後  
霜傳新信雁來初  
雲山不用遮方麴  
燈火惟應照佛書  
寫寄寂寥君定會  
宅南難覓柳郎居

讀水經注寄金壽門

霜橘耀西林木葉滯寒雨  
流觀桑欽書靜檢道元注  
峰瀨奔几案恬目非一趣  
玉筍若境接香爐定神遇  
或時談幽怪細儒謬誤不  
知天地大安識陰陽鑄持  
問蒼水使祕簡儻可覩  
弱齡耽覽涉苦乏濟勝具  
不如從韓

終服食生毛羽君有禽尚心告我懷所寓

西溪道中

連野看峰秀晴雲忽有無寒田吹穉稌清渚亂鷗鳬意  
謂前林近誰知細路迂人家炊過午空翠集山廚

由牛滑嶺至龍門坑

山腰多農家茅茨映山色暝烟歸樵人溪光帶禪客樹  
遺鶴毳鮮泉瀉龍簾白愛此欲移居惆悵振輕策

宿龍門山巢雲上人房

山在錢塘之西  
俗名小和山



山樓出樹杪夜宿萬山中虎嘯不驚定鐘聲疑在空背  
窗棲鳥影滅燭聽松風明日尋階水應添十二筒

冬日雜詩二首

霜酣槲葉一村明茅屋高低烟火生多事牆頭烏白鳥  
夜闌相答紡車聲

水邊僧屋剎竿雙飢鳥窺人上石幢解向西風吟落葉  
黃金合鑄賈長江

蠟梅

勻掠宮黃鬢采鮮斜門疎竹暎便娟年年分餉銅街處  
正是城南小雪天

月夜自草堂步至永壽寺望東臯餘雪

微月在門前冷然發清興衣棱入風舉屐齒共冰競遂  
尋桑竹間蒼涼得古徑鱗鱗見殘雪遙山瑩而淨陰地  
銷還凝老屋凍稍勁卻顧所來路始知原野曷寒鍾遠  
更響到寺棲禽定霜闊星芒大天清樹影正決背無纖  
翳觀心極明暎悠然林臯意即事寄謠詠

人日游南湖慧雲寺七首

以下  
乙未

南湖春水綠溫暾老柳生稊竹有孫頭白僧閒能引路  
斜陽挂處指三門

鐘魚寥落入新年玉照堂空賸水田今日不成煎餅會

粉圍香陣憶詩仙

張功甫賞心樂事有人日煎餅會粉圍香陣攤詩仙張梅詞也

禪房鴨腳脫層陰定破關門芋火深至竟繁華歸夢幻

最無人處叫春禽

蓮莖芡葉卧欹斜水外經寮記鬪茶劫火南朝四百寺

一袈裟地屬張家

捨宅裴休事亦勤披緇王旦謗須分淳熙年往碑陰在

細讀龍華發願文

寺碑史浩撰樓鑰書碑陰功甫自作捨宅發願疏最工首二句即隱括其

語

朱崖南去鳥呼風草木平泉笑衛公何似試香城北墅

殘僧禮拜冷烟中

登高何處可忘歸古寺梅風動客衣漸有放生團社約

魚苗如蟻水初肥

過丁茜園齋觀陳洪綬合樂圖

春陰泥殺人如醉不得醒東風勒花房未破小桃杏  
竭來過蕭齋款語樂閒靜先生澹蕩姿愛客具佳茗  
那用嘲水厄頗足勝酩酊自起展襟袖射目驚秀穎  
一女髯兩鬟輕紅掩斜領摻手摩長笛將吹絳脣冷  
一女臉如蓮黛色自修整襖袖飄回風輕容曳烟影  
半扶琵琶肩指撥試俄頃復有兩女奴鴉鬟遮瘦頸  
腰身十三四背面若相請或是梁綠珠生自雙角井  
弟子得宋禕吹笛

入清迴或是楊阿環合樂最機警鳳紋邏迤槽只有阿  
蠻省先生木石腸伐性久已憬翻然持此幅儻足娛老  
境列屋閑蛾眉便娟笑齊癭無須五斛螺簾衣無可屏

沙河

澄明日影射魚罩淡冶風光上鴨陂齊浸籬根三尺水  
小桃正是試花時

寄倪子珍讀書仁王寺

聞君高卧浴生咏遙望吳山病目揩居士舊傳十笏地

幽人新學八關齋  
野雲帶雨飛入戶  
林鳥聞鐘時下堦  
更憶清吟獨繞寺  
撚髭不覺落松釵

北郭

北郭夕陽外  
人家住水西  
藤花當戶落  
荷葉並橋齊  
沙碧鳥雙下  
樹涼蟬獨嘶  
輕絺來往熟  
幽興坐堪攜

早秋夜坐懷蔣丈靜山

夜軒殺明燈  
秋蟲啼四壁  
人靜月復清  
雲疎雨猶滴  
懷君竹間徑  
況此風中笛  
幽意其如何  
堦草自寂歷

絡緯

絡緯亦應候身潛葉底鼓刁騷風激響斷續雨無悲破  
屋燈青色柴門夜黑時哀聲感寒女能得幾絢絲

送梅耦長先生罷泰順令還宛陵

歸去宣州七月初蕭然行李意何如官身已謝潘懷縣  
真散應同陶隱居稍待西風看雪稻更聞春網薦琴魚  
修船謠似春陵作此日雲山不負渠

先生在東甌時作  
修船謠恤民役也

題畫松鼠



閒拏五粒戲睽目烟霄外不須歎倉中久已誤上蔡

汪青渠送硃光牋

蕭然注毗曇長物亦何有夜吟跼壁卧朝吟但袖手故  
人造雲藍輒遣五十枚瑩然女兒膚心目為之開一笑  
磨烏丸欲試復惆悵刺藤遭天闕此語定非妄既無連  
絲書亦無播拈詞時展白萍文報君長相思

月夜懷金繪卣游湖南三首

徘徊去燭房延佇啓虛牖白露淒未零衆星惟見斗清



湖上擬游龍井不果寄汪大興

平生湖山鄰幽夢阻龍井辨才跣趺處結思令人癭畢  
景來北山清樾鳴禽冷下見澄波生鱗甲感百頃窈窕  
前林烟相戛兩峰影樵徑橫翠微莫辨風篁嶺遙知清  
泠淵梵放相與永何時同君游佳處得細領

西溪月夜懷大滌山二首

天柱峰頭見晴雪瑤壇玉洞暗相連石林夙具看山癖  
也負知宮三十年

葉石林提舉洞霄宮嘗曰吾知宮三十年未暇一至孰謂吾為愛山者乎

雲根際夕抱冬心溪曲沿緣不可尋遙想郭文棲隱處  
夜泉孤月萬松深

金繪自自湖南游桂林歸賦贈

西南山水敵清都天與詩人縱目殊郡有顏公稱二始  
溪經元子署三吾釣藤酒美能攜否桂布衣輕得浣無  
笑我平生寡游歷相逢子細問嫵隅

讀五代史二首

五季方龍戰濁亂失昏曉士有苟祿者傾身以營飽遐

哉鄭先生冥心棲靈顥松脂去三尸獨立塵瑱表

吾愛張監軍心為巨唐有不知鬪雞兒自取竟相負刑  
餘誠何傷報韓同不朽區區六臣輩晝日但顏厚

江上訪金壽門出觀顏魯公麻姑山仙壇記米海

岳顏魯公祠堂碑拓本

雲沙繞村南小築如鹿柴

去聲

埽地焚香人相見一瀟灑

論書近攬拾勿事徵倒薤側聞麻姑壇名蹟興先邁餘  
髮時垂腰丹砂亦狡獪有無海揚塵故地今神界堂堂

小顏公頗喜奇怪波瀾縮道麗接待記仙話陶八碧  
霞丹入嚙若沆瀣汝州死大節竟等蛇蟬解顛人述其  
事穹碑字如蠶緬彼天寶季豔煽金鏡壞二十四郡中  
義士抱耿介獨抗阿瑩山聲振哥舒敗晚令使賊庭讒  
口足顛齡即云歸羅浮乘風固可快靈均為水仙理有  
說非註持此語故人相顧發長喟落落青瑤鐫當見百  
靈拜坐深地爐灰浩歌共決臂

同南畹二兄游河渚飲沈晴川書齋

以下  
丙申

到來知不易遠近引漁謳野水中開閣交蘆外倚舟峰  
陰含古色梅凍得清愁漫比平原酌高人肯見留

寶蓮山是韓平原故宅

霧閣雲窗付渺茫平原事往徑全荒居人不識太師竹  
風葉幾枝搖夕陽

題沈其章秋林積雨圖

黯黯秋郊陰淋漓愁霖晦作此雨點皺濃如五斛黛堆  
阜互起伏徑術迷向背目窮中林深却滴梧葉大數間

尖頭屋溼雲垂霑霽潤疑生青苔漏欲添白蓋勿謂炊  
烟遲此中有人在

觀吳耕民所藏唐泰山摩崖碑拓本同繪自作

羨君少年癖好古曾臨日觀登天門穹崖彩翠忽明滅  
雞號下見扶桑瞰開元天子勒銘在苔滑不憚兩手捫  
為尋墨本完好寡過客求索民胥冤梯空緣壑歷至險  
實惜鉅費哀驚魂野火燒裂風雨碎連紙珍似收璵璠  
魚金購此得舊拓坐客竦視息衆喧八分飛動六百字



鸞飄鳳泊神明存當年東封有本末燕公為相開其原  
誰與異議獨乾曜廟堂那念供頓煩惟侈海宇已殷富  
思以大典誇黎元金泥石礧事非古萬乘帳殿勞雲屯  
天章震耀復嚴謚御墨揮灑如飛鸞未聞虞舜昔封禪  
大書深刻留巖根況無本命禮西嶽金天位號何雄尊  
述聖頌得呂補闕豐碑離立蛟龍蹲岱宗事盛過太華  
遺制遠與乾封論須臾時世易天寶兩京湏洞風塵昏  
青驪蜀道播遷日百神不效前驅奔乃知用事睹符瑞

史公載筆皆微言北里之禾鄔上黍秦漢故轍徒紛繁  
即如此碑亦炯鑒延秋門外哀王孫濡紙脫文一感際  
排翮思作摩霄鷗

感秋

炎景忽已往素節來有期西池日夕涼風雨飄無時高  
樹易為響離蟬如自悲誰能慰縣思非無酒盈卮

秋日同王菊存汪青渠楊開緒渡湖至壑菴由幽  
居洞上看摩崖家人卦登慧日精舍訪亦諧上人

際晚下山尋明昌化伯墓不得汎舟而還得詩四

首

延緣截鏡面一湖殊陰晴西南三五峰雲氣縷縷生孤  
擢即前浦翹鷺涼不驚朱甍林表燦綠樹崇岡纓遙聞  
微鐘響旁見孤塔明南屏忽覩面蒼翠紛相迎水天寂  
於夜到岸孤蒲聲

注目望山坳靜侶若孤往隱見草間泉時有脩蛇想清  
風散木魚佛屋藏篠簜度橋潭鏡皎入洞出楹敞窸窣

中復穿微徑折屨上快觀涑水碑義取風火象摩崖擅  
八分遺跡成俯仰秋氣松際來吹作居巢響

絕頂露扶闌懸崖度禪榻為訪贊公來不憚芒履踏入  
室憺忘言風樹自相答四角鈴鐸鳴衆綠何獵颯俯見  
北峰雲奄與南峰合雨腳渡湖至驚起兩棲鴿一氣中  
迷濛天鏡互開闔稍霽烟鬟靚日射黃妃塔了然清淨  
界幻象無不納同游五六人看雪期深臘

取徑下仄磴秋草自作花山風襲人衣叫噪白項鴉飽

聞外戚墓厚葬崇驕奢當時議禮者恩先丁傳家吁嗟  
百年後變化如蟲沙大儒推控頤金棗出隧斜欲往弔  
興亡覓路迷三义暝色起前林喚渡艤子挈晚湖波皺  
鱗衆岫興陰霞歸時想清景漏鼓忘頻撾

池上

高柳初髡倚晚汀幾時來此補魚經昨宵知有稀疏雨  
滴破一方青白萍

佛屋間題

梵夾意蕭然安居不離禪人依淨綠水地輒妬羅縣已

菊將梅候初霜欲雪天何妨臂鷹手自送佛前錢

白香山

月觀音讚云淨綠水上虛白光中地觸柔輓似妬羅縣見法苑珠林

九里松至西山道中同金壽門周少穆王雪子作

不負幽尋出郭門木絲裘暖趁朝曦山遮壞塔可十里

樹裊孤烟自一村高冢多風松落子空田無雪稻生孫

須知歲晏人游少正要諸公細討論

過宋通問副使朱公少章墓

突兀殘碑立古阡行人猶記紹興年青衣已見君王辱  
白髮何期使節旋老淚冰天佗日恨遺聞曲洧至今傳  
一杯築並花宮地夕唄晨鐘更惘然

冷泉亭

衆壑孤亭合泉聲出翠微靜聞兼遠梵獨立悟清暉木  
落殘僧定山寒歸鳥稀遲遲松外月為我照田衣

靈隱寺月夜

夜寒香界白澗曲寺門通月在衆峰頂泉流亂葉中一

燈羣動息孤磬四天空歸路畏逢虎況聞巖下風

曉登韜光絕頂

入山已三日登頓遂真賞霜磴滑難踐陽崖曦乍晃穿  
漏深竹光冷翠引孤往冥搜滅衆聞百泉同一響蔽谷  
境盡幽躋顛矚始興小閣俯江湖目極但蒼蒼坐深香  
出院青靄落池上永懷白侍郎願言脫塵鞅

蓮居

宛似游虛落疎籬曲繞門僧房倚樹腹梵板響城根犬



吠驚風葉鴉歸識水村流傳李先輩瘦硬小碑存

中有李長

蘅書碑  
絕佳

西溪泛舟遇雪

以下  
丁酉

孤櫂不覺遠窈然流水深春烟沈大嶺密雪響疎林白  
社何年約青蓑舊隱心推蓬起寒色雙屐阻幽尋

題陳子健所藏宋人畫太真按舞圖

柳芽將吐菜甲新西堂小雨愁青春有來此畫傳院體  
調鉛寫黛知何人三郎深宮常晏起獨愛霓裳譜風水

太真能舞作舞詩羅裊動香香不已念奴按拍寂不喧  
罷敕雜樂呼梨園至今看畫尚有恨鞦韆未歇烟塵昏  
良工好手誠難遇周昉張萱具生趣勸君裝潢藏弄  
佗時好待添丁付

西溪歸訪王既咸

牆東君公清且賢留客纜我西溪船  
霍山廟前看殘雪溜水橋下添新泉  
梅開香破缸面酒日出暖射牀頭氊  
春濃更當挈伴過菜花鰓徧村村田

三月十三日游法華山

連山背湖西地脉聚而凝婆留霸氣餘峰嶺尚雄勝嘉  
我同游人穿榛得荒徑陽坡鼈裙披陰崖龍腹亘天風  
鼓蓬勃白雲若沸甌置身萬松顛心曠肅觀聽紆回下  
前阪翠樾出僧磬入籬泉偶枯方井鑒亦滢繡田盡雜  
花烟中笑羣媵茶戶競物利衣短不掩脰采摘泣晨露  
山謠頗相應酌酒墟墓間作達槥隨磬芻狗本幻誕石  
馬久光瑩神絃走村氓縹緲事愚佞洞簫裊林木篝火

繞巖磴因之日夕還嵐彩眩難定此境天所遺庶以忘  
蹭蹬望中青帘曳猶似攜餘興

北郭紀游四首

散花灘

當年張外史此地有行窩喬木居人少蒼烟廢圃多道  
心遺外物身事託樵歌最好灘前水春來似熨羅

江漲橋

長虹偃郭外勝日記偷游簾卷橋南樹花飛水上樓客

行津鼓動天遠峭帆收俯仰悲人代茫茫對碧流

妙行寺

棟宇何年締規模壓一城烟霄竊鐵鳳風雨吼華鯨臨

水春船集巡廊午日明喻彌陀畫佛不見斷碑橫

余嘗見元

郭天錫容杭日記云出北闕門妙行寺中有碑石數本云喻彌陀神筆所畫佛像次禮古觀音像相傳唐朝塑者今則俱無之矣

西馬塍

行徧馬塍曲春風無處無酒堪澆白石墓已沒黃壚接

樹看鄰媼傳芭走里巫移栽入朱戶舊事續潛夫

宋姜堯章

葵西馬塍蘇石挽之云幸是小紅方嫁了不然啼損馬塍花小紅范石湖所贈青衣也見陸友仁覲北雜志

晚步

斜景忽已暝流鶯時一鳴水光知月出花落見風行僻地非遺世新畦欲耦耕孤吟少儔侶發興自江城

園居和蔣丈靜山

市塵拋後稱閒居好結南隣分有餘  
迳相過惟礙竹小畦旋往欲刪蔬  
不離板閣池光動自下蘆簾暑氣疎

寄語輪蹄馳逐客清名持較定何如

秋分日呈陳楞山無寄亦語上人

拉瑟西風故故催江鴻社燕共裴回那知極浦水花老  
又接繞籬蟲桂開隔歲相思同濁酒幾旬塵土挽純灰  
瘦權更在高寒頂清露翻經坐石臺

題水居追暑圖

峭壁插天下無地萬荷喧雨境翛然適來披畫當秋爽  
尚想風亭散髮眠

友人貽頻婆果賦謝十韻

是物幽燕貴雕盤獨薦時芳華存梵夾蔽蒂補風詩

朱竹

垞太史曰下舊聞云疑即甘棠

楚楫名空得唐梯摘易為乍隨籠壓騎

還想雨低枝澹白腮輕柰勻紅頰肖梨靈根吳客少俊

味細娘知齒冰臨叩渴香迷下蔡疑枕函聞逆鼻

采蘭雜志

頻婆果夜置枕邊微有香氣

瑤席顛支頤墜地誰工寫

宣和畫譜畫墜地果易于

折枝果

傾筐肖見遺玉窗春夢裏好好寄相思

雨夜述懷十三韻



凝雲催暝早坐覺瀉幽淙院靜無來雁天陰絕吠尨薄  
寒初淅淅孤燭自憧憧觸迂愁難斷音短崢嶸意未降畏  
途同歷阪殘歲類奔瀧入世憎高髻澆胃漫滿缸前塵  
青豆舍舊夢碧油窗曲踊何煩百吹簫信少雙浮沈仍  
蠹簡浩蕩想漁艫虛冒棲遲好須安里俗吮朋歡違尺  
素詩敵束空杠倦枕敲還醒清鐘速更撞幾時深卜築  
繞戶種雞腔

無盡意齋寒夜用覺範送元老住清脩韻

竹雪欠清聲，鉞笙有餘韻。西齋擁爐坐，燈火耿幽暝。微  
緒獨繭繅，長謡適真性。朱門貂襜褕，夜游付一哂。生平  
號迂疎，屬歸真自號  
錦溪迂疎子窘步遠捷徑。寒林聽脫葉，復落固  
不愠。何妨戒香熏，詩格與僧近。聊以文字禪，解此塵土  
恨。折龔黃梅花，是名意無盡。

歲暮答王旣咸

北郭幽棲一水涯，松毛蓋屋蘚侵堦。詩來慰我不稱意，  
歲晏憐君獨寡諧。臘鼓無端喧委巷，春燈取次翦閒街。

疎梅半樹展書卷  
臙欲此中尋好懷

春寒

以下  
戊戌

初月已既魚上冰  
峭寒陡作相憑陵  
濃陰黯黯天地凝  
欲見白日何時升  
紅舒翠坼力未勝  
有如志士坎壈仍  
空齋枯坐粥飯僧  
喋痺誰送半臂綾  
夜聽街鼓睡不能  
紙窗升降風中燈  
侵晨更覺被有棱  
所遭偶爾吾何憎  
只思布韞游馬塍  
花氣一片丹霞蒸

春日逢施謂伊話舊

十年墜雨惜相違朋輩如君儂指稀雞肋只今殊少味  
虎頭何用盡能飛秋湖憶共青油舫晚寺曾尋白竹扉  
回首昔游都在眼杏花風外一需衣

二月二十七日臯亭山下看桃花二首

登船出郭即通津不負佳游及此辰  
駘蕩年光挑菜渚支離身事看花人  
戲鵝語鴨漁莊靜烟暖天清水寺春  
當境底須頻恡酒銑溪如許已成塵

臯亭山下集游船半載尊罍半管絃  
並岸斜看花影倒

落英亂點水文圓東風不信將三月往事無多又四年  
只有吳娘知可惜折枝繡滿禿襟前

首夏雨中即事

不斷迎梅雨散絲水村誰與共心期晝眠有味低回久  
殘客無情報謁遲乍暖乍寒開苦棟澹紅澹白到戎葵  
平生閒卻籠鷹手自試隄廩寫小詩

病目戲成

微病何來解相惱焚香掃地一閒身且輸名士誇巖電

欲共高僧究眼塵細字難拋工作祟好花飽看已過春  
皐羅為障非吾事養就疎慵學避人

月夜舟出北關同壽門作

出門輕百里猶喜共君行雅愛聞吳語誰能計水程野  
橋迎月直斷岸見烟生涼蛤爾何意喧眠到五更

菱湖

到眼忽成市千家匿鑑開魚多論斗賣菱好及時栽歷  
歷帆斜過汙汙水倒回有人葭莢外銅笛或吹來

碧浪湖

白塔紅亭宿霧收  
放船港口足銷憂  
蘆分山色離披去  
水接雲容淡迤迤  
浮風物三吳何處  
最陂塘五月已如  
秋樊川可是詩情  
減不為探春也合  
游

同壽門訪長興鮑西岡明府留宿縣齋即事

聞道吳西俗最佳  
扁舟聊復散幽懷  
詩人來作長城宰  
客子如傳小謝齋  
落魄自憐仍楚製  
荒唐多分續齊諧  
梁吳均邑人  
著續齊諧記  
凌晨忽起游仙興  
震澤包山詎有涯

督牛犂我田歐陽圭齋句也壽門為圖因題其後  
高人思食力所寄在扶犂自足一生事何知四體疲鳥  
捷行水淺白鷺下田遲緩緩逢鄰叟香杭問可宜

同壽門游若溪廣惠寺是陳武帝故宅

寺中有井  
相傳帝初

生時取水以浴忽涌起數尺  
明歸熙甫作令時刻銘其上

若溪走玉龍連山抱千層水風引到寺老樹青鬚髻上  
巢大背鳥下絡交枝藤王氣久死灰陰怪爭來憑陳帝  
起里中樵牧猶相矜擣青一旅奮驅賊如秋蠅悲哉蕭



老公不得顧眇僧跛奴亦何為大命歸吳興此地即豐  
沛精爽依禪燈長爪攜淑儷雉山望雲蒸我來漱井眉  
銘辭義峻嶒傳是洗兒日寒流湯泉騰更作辱井戒不  
覺欬歔增可憐馬上郎義憤尤足稱成敗有天定隙為  
英雄乘煌煌江左業從此期恢弘身後那可料暴骨撫  
讐膺古愁起暮色閒話同詩朋循廊土花碧鈴語搖觚  
棱

蘋洲曲十首和鮑明府

日落采蘋去江南春色明不因洞庭客那識是閨情

邱光

庭無明書解柳惲江南曲云是樂府閨情之遺

曉過嬰蘭堂逢見嬰蘭婦為采黃藤桑方出撦素手

董斯

張吹景集云吳越備史錢鏐有嬰蘭堂詩古樂府桑桑感陽風阿那嬰蘭婦唐人采此為名耳談鑰吳興志鄉土有黃藤桑

郎羨合羅絲水凍色更鮮儂羨同功繭一生作纏絲

謝肇

湖西吳枝乘湖蠶最上者曰合羅絲繅以兩蠶共作繭者號同功繅

新梳苗香髻試約春游伴莫上棲賢山怕人呼作管

西吳

枝乘云吳興里語呼誰為管管夫人棲賢山人見松雪  
誌項臯謨筆記云吳中有韋娘髻後更謔為荀香髻也

網得車溪魚歸來揺短楫為郎持作鱠最愛對翻蝶山  
謙

之吳興記車溪出美魚明苔上祝翁家藏唐人  
所繪書一編有舞梨花柳葉縷對翻蛺蝶等名

行經蒲帆塘塘水碧洄洄想當初開日的是見歡來  
唐新

書烏程縣北二里有蒲帆塘刺史楊漢公開而得蒲帆  
因名周密齊東野語唐樂府云蒲帆猶未織爭得一歡

成舟子呼  
造帆曰歡

朝乘采菱艇蕩漾出湖趺羅席十二摺摺摺似青蒲  
宋章

淵伯深居若溪有槁簡贊筆云羅席十二摺  
吳中下里之曲也談鑰志湖趺菱色紅而大

豹脚猛于鷹輕綃圍夜玉安得邀歡來江子匯邊宿

吳興

多蟲豹脚者尤毒東坡詩風定軒窗飛豹脚是也惟江子匯無之

梅子雨初過儂家水浸扉淋灰應有禁不出浣春衣

張雅

通茗紀湖俗夏至日斷梅立時半月內禁淋灰浣衣

雲溪水四合飛英塔兩重住近墜釵橋早晚郎相逢

太平

寰宇記雲溪在烏程縣東南二里凡四水合為一溪李訓戒巷漫筆湖州飛英寺塔中空復有一小塔甚奇巧

墜釵橋見勞鉞湖州府志

吳興歸舟作

風俗家多具畫船  
苔山浮碧在門前  
自牽賤事忽忽去  
不為蘋花住一年

七夕宿澗西微上人房

入寺松櫟深幽涼  
蘇暑病崖上飛雨收  
林中微月映窗  
燈翦復翳經聲出  
蘿徑空山落秋河  
無人同眺聽

秋夜雨中集汪抱璞齋

愛君池上好不厭  
夜來頻微雨宜幽鳥  
初涼健酒人蕭  
蕭添白袷  
點點到青蘋  
共有悲秋意  
商歌激四鄰

雨

翼翼中宵雨聲繁遂達晨長風吹不已幽草洗俱新  
閑戶耽幽思褰帷起病身惟添上池水煮藥更應神

八月十五夜對酒作歌

院宇霽夕氣圓鏡初徘徊紛紛流汞瀉青桂顚顚白露  
凝蒼苔既佳光景惜芳夜何用絲竹鳴相催眼前無二  
豪即時有一杯天上愁浪寄地下憂空埋倚門抗讎亦  
徒爾置身或在才不才淋浪劇飲自起舞寒輝滉漾侵

衣來妖墓決吻吾且待仍看向曉無纖埃

是夜月食

### 秋園

瓠架初除搖落時人間秋士漫生悲  
牆東小隱寧非計竈北清狂枉自奇  
露白稻香聞吉語天青蜚咽動幽思  
朝來郭外山容爽為報閒居取次知

### 獺

穴居水游不可測鵜鷃何事濡其翼  
祭魚黠冒知禮名祭罷春江覓魚食  
捕時爾莫訴煩冤畫板為鰲銜主恩

丹砂不惜和取髓好補吳姬如意痕

三徑草堂晚桂

陽春桃李花綴枝趁妍暖偃蹇青桂叢花中亦中散隨  
時有不堪養生遂成嬾結根幽人屋枳櫨俗喧斷高秋  
月餘閨疎香吹始滿分無樂天曲新調按銀管聊學晦  
堂禪微言對偏袒寄語主林神知希我自罕

隨意

隨意三條徑斜通十畝塘閒非行散得樂豈注書妨水



碧全涵日林紅半帶霜何須鄙夫有寓目一相羊

夜雨薄寒

閣迴窗虛最寂寥卧聽撼撼葉辭條寒初驟入蟲蟻薄  
雨滯旋看蠟照銷一石飲餘聊善謔四愁情在自長謠  
若為學得頭陀法忘盡前心坐徹宵

白香山夜雨詩不  
學頭陀法前心安

忘可

初寒

塵務經人心思如智井酒雙轂轉不停淒飈陡然作古

人期立名嗽盡畏貓貉千秋萬歲後遺跡付寂寞何當  
攜酒瓢東郊看黃落直追斜川游不羨典鳩樂

城西讀書雜興二首

烏几麕牀位置便此身暫寄亦隨緣且疎應對如高坐  
未有神仙學稚川世路淹回魚上竹歲華飄忽鳥驚弦  
時時夢到曾游處溪畔苔花壓釣船

蕭然無客似離羣都護邊書忽遣聞計日止戈應送喜  
何人磨盾欲從軍湖通舊引穿溝水城隅猶屯過嶺雲

誰向壽安坊裏問廬陵風調有遺文

壽安坊一名花市  
元張光弼故居

於潛王柘村明府招飲寓齋

古屋通津外官閒客復來危檣依水立疎樹向門開坐  
少於潛絹香餘下若杯明年天目約飽看白雲回

曉至湖上

出郭曉色微臨水人意靜水上寒霧生彌漫與天永折  
葦動有聲遙山淡無影稍見初日開三兩列舫艫安能  
學野鳧汎汎逐清景

十二月十二日大雪用東坡聚星堂雪韻

寒空似墨吹雲葉今年真見頭番雪  
魚羔醺酒任豪奢  
擁褐攤書助清絕  
渚田飢雁跡欲迷  
深霧跋鳥足愁折  
積盈暗隙曉光早  
灑急初更衆聲滅  
風饕旋作怒虎吼  
臘殘已似脩蛇掣  
細填佛剎妙莊嚴  
靜檢詩材棄華纈  
會參老宿問當機

中峯雪詩誰解  
當機作水看

安得清言紛鋸屑有

人鈴馱犯凌兢輸我蘆簾看飄瞥一篇語奇萬口傳

東坡

詩序云于艱難  
中特出奇麗

明年餅大千村說江干往事更回首帆

飽長淮思老鐵

往與楊山雪中游江  
干今楊山客淮故及

次韻酬石貞石雪後過訪

安得孤清一破除  
近來交舊頗彫疎  
竹窗正在聞風處  
雪徑惟君著屐初  
僕射樂猶輸飲酒  
諸生業轉困慵書  
江干想見寒林好  
亦欲時時過隱居

於潛王明府寄白朮

市中何處覓靈蹤  
滿把雲腴手自封  
藥重一丸慙魏帝  
復誇五葉謝神農  
塵區有藉能蠲疾  
福地於今可鍊容

為向小窗抄序罷幾時飛鳥得相從

皮日休詩白月半窗抄术序术序紫

微王夫人作也

臘月二十四日風霰交作

塗竈傳茲日東京俗尚存祭猶名老婦靈欲乞嬌孫微  
霰侵敲枕淒風助閉門久耽蕭寂味寧與子方論

樊榭山房集卷一

欽定四庫全書

樊榭山房集卷二

錢塘厲鶚撰

詩乙

雨中耕民寄新詩兼貺九藥奉荅二首

以下  
己亥

抱病卧旬日春物遂已深流光惜晬晬天色空沈沈  
密雨泣苔徑輕雲冒花林花飛憺世慮苔積娛沖襟  
開緘有佳約霽景猶可尋

若士思遠遊達人謝拘束身如腰鼓頷四塵自奔觸豈  
無上藥草病求恒不足惠而思好我更徵桐君錄顧我  
寡裨益拜命亦良辱

三月十五日晚泊東新關

解纜細雨吹烟昏叢蘆高柳搖空村晚泊沙汀見燈火  
田家笑語生春溫我生汎梗遽如許難得扁舟同舊侶  
休憎一夜風打頭明發青山堪與語

虎阜即事



塔迴廊迴燕燕飛送春人去戀斜暉似嫌華瓘侵羅襪  
却要殘紅作地衣

同青渠抱撲游惠山

梁栢日出宿雨捐主人急喚沿溪船清尊在船興已發  
剡剡麥秀翻平田游人愛游較我早爭入柳港吹香絲  
名園在眼昔夢到紅橋翠棧相鉤連九龍山色滿屋上  
妙有流水巖根穿琤琤下赴照軒檻木陰鬱鬱堪暑眠  
尋源且復入古寺泉頭小閣浮茶烟百甌汲貯轉甘冷

遠道拆洗煩烹煎

拆洗惠山泉  
見清波雜志

南泠廬阜味奚似屈居

第二吾猶憐平生飲水具真癖烟包雨笠同枯禪千羨  
萬羨竟陵子頓棄塵吻寧無緣道人鵲眼照泉碧松聲  
為拂膝上絃罷琴落日我徑去塔影送客東峯巔

題對山開卷樓壁

僧樓恰對惠峯開寒玉泠泠步屨回待與山靈話疇昔  
杜鵑紅處我曾來

游蕃釐觀

淮南何年祀媼神雲階月地鎖青春隔江遠見山凝黛  
斜日初來雨洗塵髣髴章郎情是幻淒涼花史怨如新  
無雙亭下青苔色閱盡閒游多少人

同程友聲紅橋夜汎

月黑水深荷葉路涼螢無數繞船飛與君今夜紅橋酒  
不負揚州白苧衣

登平山堂

落日堪銷暑疎蟬喚客游析酲嘗蜀井過眼歎迷樓天

淨山容出堂空樹影浮昔賢遺勝地撫檻小遲留

初秋寫懷

風雨軒窗枕手吟乍涼曉覺滿西林年光又共草色變  
秋思有如雲影深坐對畫叉添寂寂閒尋茗盃試森森  
第三橋畔萼香滑欲動歸橈一夕心

題陳楞山秋林讀書圖

橋隱迴溪樹隱樞人間有此小林坳西風日日翻書葉  
吹得數峯如許青

西溪福清竹院

溪行興不已竹中得安居斜日入深碧冷然風更疎牀  
下解脫履几上乾竺書山僧不出戶情滅心晏如

十一月一日自西溪汎舟之餘杭

性拙見山喜匹如故疾失餘杭有勝踐梭艇冒淒颼疎  
林翼霜岸破屋列烟術揺兀溪光中煜煜上初日平野  
皆令姿踈澹狀非一況逢載獲後田水涸已畢曠望愜  
所宜漸進叢篠密喧雀迎舟前幽討自擁膝稍稍居人

稠佛剎林外出西峯若有期消搖聊短述

南湖晚望

清絕苔南境晚來歸鳥翻草枯羣淑出烟起亂峯昏僻

邑無驅馬閒農早閉門叢祠望燈影神力至今存

漢令陳渾

開南湖捍水有功  
湖旁廟祀甚盛

游洞霄宮

大滌元蓋洞天夙所慕時時飛夢凌孱顏茲辰奮足遂  
躋討芒屨豈憚山行艱初從南湖歷四井霜清日出羣

峯靜紆回路轉金綫潭鑑匱不動澄嵐影偶逢絳子為  
指迷深入橫林竦壁得異境青山九鎖勢更殊千尋拔  
地秀不孤松栝溼翠交撐扶石橋流水聲可娛道旁碓  
響雲母粉巖隙乳滴羊須珠傳聞舊有無骨箬可等羅  
浮古積竹葉符帝留瓊館此奧區圓殿高峙凝塵無其  
餘廊廡雖溼蕪蒼簑萬个為笙竽寒風噫竅洗毛骨白  
雲上下如飛鳧我思郭文舉無情木石相爾汝何時月  
底騎虎歸泠泠澗上聞仙語我思鄧牧心黃冠遺世來

烟岑幽泉滌硯作山志俗士未許窺清襟自從糴郎作  
相年祠官往例縻諸賢提舉惟有李忠定采主塑像永  
永無祧遷尚餘御筆觀虎卧

洞天福地額  
宋理宗御書

寂歷閒階少

人過真茶吸比換骨膏半日盤旋雜行坐天柱峯大滌  
洞瑤房玉宇恍如夢太息天寒日短不得游留與他時  
策杖尋清秋

喜雪

試雪連朝雪已成彎跼板閣冷光生斜飛堦面偏多態



白膠池心大有情  
炙硯可無今日興  
打窗仍作去年聲  
水仙已萼黃梅破  
共領人間第一清

雪晴

積雪色固佳  
消雪無留痕  
南榮聞餘滴  
東曦暖微溫  
既霽風漸柔  
淺綠含陳根  
苔穎行有時  
靜念造物恩  
余拙謝百事  
抱影寄空村  
淨名經卷在  
昔誦尚默存  
婆娑一室間  
妙香領無言

次韻答繪  
卣春日見訪不值

以下  
庚子

東郭半春色能來破蘚痕  
隔林機蹕響比舍井泥渾  
行藥非過市看花乏應門  
棲遲如可託重有顏荒園

原作

錢塘

金志章

繪古

雨後春泥輒行吟  
認屐痕菜畦迷遠近  
池水漲清渾看竹過隣舍  
聞鐘憩寺門  
詩人不可見惆悵出東園

四月十日湖上作

愛來湖上作浮家艇子衝波一道斜  
日晚水仙祠下去  
青山影裏采蘋花

九月五日南山紀游三首

石屋

秋晴風滿山，破寺娛清晝。  
石作鬼面皴，樹比佛脾瘦。  
天橫尋丈碧，幽幽坐雲構。  
摩挲辨題名，苔蝕半脫漏。

水樂洞

徑折穿羊腸，複洞空響接。  
清游宛前事，七稔等交睫。  
裂石出怪杉，黏竹見寒蝶。  
乞此流水聲，洗我雙荷葉。

理安寺

老禪伏虎處遺跡在澗西巖翠多冷光竹禽無驚啼僧  
樓滿落葉幽思窮扳躋穿林日墮規泉咽風淒淒

蕭山

喚艇晚來急天陰雲欲凝樹紅迎北幹江白隔西興賣  
橘山家賤歌菱越女能東游興不淺篷雨響疎燈

北幹山名

山陰舟中四首

寒雨欺晴曉未歇故添溼翠到船窗西風併作銷魂思  
新雁一聲飛渡江

白塔湖邊孤櫂開  
風回忽卷亂雲堆  
越山絕似西施髻  
朵朵翠翹浮水來

幽泉細細葉蕭蕭  
白石清沙舊板橋  
最好晚山堪畫處  
一帆風裏送歸樵

鏡水稽山照眼清  
吳兒未肯寡詩情  
愛閒欲向天公乞  
采若籠鵝足一生

夏蓋湖

幾曲蘆漪外如梭  
艇子過駕風波忽  
大到海地無多茫

昧思前古悲涼發慕歌

事見晉書  
夏統傳

寒更何處泊髣髴聽

鳴鼉

義石謠

并序

慈谿縣長溪嶺下有石翁仲明故宦某墓上物也後嗣  
衰落將鬻於他姓夜夢翁仲告曰吾事君先人久義不  
可去明日集衆牽挽之重不可移強舁至數武遂折焉  
鄉人竒其事為亭覆之顏曰義石予過而作是謠

武擔有石鏡祇照妖魄啼昭陵有石馬但解中宵嘶長

溪嶺下松楸地石人將移寧隕墜無數青螢照漆燈憶  
君長是垂鉛淚溪風颯颯石人語吁嗟得新母捐故

展先大父墓感賦

吾祖墓頭柏先親昔淚斑生遲違撫抱僑籍隔家山遺  
德耕耒內棲神恬漠間酸辛纔一到酹草想音顏

鶯脰湖

帆影挽不留依依掠沙渚豁然晚湖開平遠迷處所病  
柳隱漁屋孤烟識炊黍單舸若汎鳧得魚網自舉嗟予

紛塵營衝寒久延竚同在一水間寸心宵相許西風不見待吹斷蘆中語

姑蘇旅舍夜雨

他鄉今夕雨漂泊暫停橈不滴無愁地偏聞少睡宵風傳街柝冷雲溼寺鐘遙多謝殘燈火留人烏鵲橋

欲游滄浪亭因雨不果悵然有作

喧闐海涌峯岑寂姑蘇臺仰止濯纓人兩度仍空來水竹不寓目吳船還獨開想見破窗下雨點寒莓苔

野蔓盤青



入破窗蘇  
子美句也

### 新豐

百里丹陽路炊烟聚一區有霜侵旅鬢計日改川塗水  
落塘猶在天寒酒可酤詩人例辛苦蹤跡滿江湖

晉書張閭

為晉陵內史立曲阿新豐塘溉田八百頃葛洪為頌陸放翁入蜀記云太白詩南國新豐酒即指丹陽之新豐

### 廣陵寓樓雪中感懷

北風凜削肌柳花溼而墜小樓更添寂薄酒不成醉入  
夜短燭孤羸僮已先睡何人煖寒譙隔院喧鼓吹沈酒

居者心浩蕩游子意平生澹泊懷榮利非所嗜西笑詎  
云樂明發難自棄茲來捫空囊翻為故交累

謂程友聲

因思

在家貧儂佯尚高致束書細遮眼疎花香破鼻紙閣無  
多寬迴隔飛塵至因之問故園南鴻煩寄字

寶應舟中月夜

蘆根渺渺望無涯雁落圓沙幾點排明月墮烟霜著水  
行人今夜宿清淮

渡河

北來始作汎槎游晚色蒼蒼望裏收一綫黃流奔禹甸  
兩涯殘雪接徐州古今沈璧知無限天地浮萍各有謀  
明日輕裝又驢背風前慙媿白沙鷗

驢車口號

輾輾雙輪盡日顛黃塵一隊逐蘆鞭柳絲未吐梅將萼  
夢到西湖罨畫船

宿遷

漸遠江南地難禁朔氣威檣烏河上集塞雁驛邊飛冰

勁妨行轍塵輕襲客衣明燈投野店草草亦如歸

郟城

下邑古郟子寒朝脂我車亭猶傾蓋舊俗是問官餘烟  
舍凝微雪風餐毛凍蔬飢時聊慰藉行役意何如

過沂水

征轅指沂水驚沙落如雨禹貢諸大川北來數凡五

震澤

江淮  
河沂

靈源自艾山其人始敷土遠會陪尾流東向滄溟

吐窮冬方凝冰文漪靜不舞居人鑿用汲色瑩白如乳

匪云川無梁橫板劣接武懸車藉衆昇索錢難饜取喧  
歷久乃過偏側良亦苦何時輿梁成神明載縣譜從此  
隔岸山快展兩眉嫵

半城

雪消半露翠孱顏紫蓋征塗犖确間畫看最佳行最險

將車初上大弁山

弁作平聲

蒙陰

衝風苦愛帽簷斜歷尾無多感歲華卻向東蒙看霽雪

青天亂插玉蓮花

羊流店拜羊太傅祠

茅屋疎林雜晚炊  
羊公祠下獨來遲  
探環已失前生樹  
墜淚猶存故里碑  
盛德在人如昨日  
清談誤世詎同時  
雍容裘帶瞻遺像  
深媿無才進些辭

泰安道中望嶽作歌

平生五嶽願未從  
真形突兀蟠心胃  
東游齊魯首瞻岱  
百里遠見嵐光濃  
半天明滅千芙蓉  
羣山如水皆朝宗

盤車五汶豁雙目元氣迴薄開春容青帝所宅神秀鍾  
富媪孕碧攢諸峯位當出震德在木天喬萬狀敷葱籠  
尊如端冕秉璧琮嚴如闢戟羽葆重陰陽闔闢百靈集  
魚雅想見乘蒼龍荒荒輦路人不逢一枝安得扶瘦筇  
堆梨散棗無覓處白雲猶護秦時松維神惠澤霑三農  
只今苦旱方窮冬獻歲二麥望成熟玉戲快雪除灾凶  
時山東雪未霑足我來欲訪安期蹤八溟海外洪濤春天之五  
嶽有東嶽矯首遙眇心怔忡征途鞭影何忽忽孤烟一

抹歸鳥衝不知氣象爾何物但聽木末敲疎鐘

謝道韞泰山詩

氣象爾何物

遂令我屢還

### 晚次齊河

白日沒長林風埃滿客襟山趨野寺斷烟入戍樓深飲  
水防齊瘿懷鄉類越吟總裝寒更紫釀雪未成陰

### 除夕宿德州

客裏休尋餞歲筵河干聊爾息吟鞭荒村已是裁春帖  
茅店猶聞索酒錢燭為留人遲見跋難防失旦故爭先



卽當遠鐸仍催起回首東風又一年

河間懷古

以下  
辛丑

瀛海盤迴地勢雄古情客思共無窮錢工數處囊偏涸  
釣欲藏時酒易空三日開年歌吹寂一城飛轍往來通  
獨憐大雅今銷歇誰向苔花問故宮

都下春雪懷里中諸友

春來旅思極蕭騰枯坐窗間類凍蠅撲絮乍逢燕市雪  
搖風不見米家燈地爐勤撥聊添火硯滴難融可奈冰

為問孤山梅息耗幾人游舫得閒凭

南歸次琉璃河

一昔都亭路歸裝只似初恥為主父謁休上退之書柳  
拂差池燕河驚撥刺魚不須悲楚玉息影憶吾廬

苦水舖

苦水名初識何年續水經高榆齊剝白

時山東  
苦飢

細草遠

連青牆上驅雞過溪邊飲馬停勞人歌一曲顚顚有誰

聽

任城夜雨

城上陰雲覆酒樓  
城邊行客苦車休  
鄉心已逐殘春雨  
一夜平添汶泗流

東臯閒居

白袷成新隱  
青苔徧舊蹊  
水明村裏外  
樹卷屋東西  
菜把官羊敵  
茶香佛粥齊  
慨焉思靜侶  
安得手同攜

李森劫鉢圖吳耕民索賦

般羅迦婦色最姝  
嗽食人子充飢  
飭彼鬼亦復愛其子

賓伽雙髻玉雪膚山雲為衣女蘿帶撫摩不忍離須臾  
佛以慧眼照惡趣知具佛性無差殊定力攝入水精鉢  
宛轉求出啼呱呱爾時鬼嗔逞餘技鳴笳連鼓相嘯呼  
兩甄八陣聚什伍頭角截業雄牙須拔河經羸挽萬石  
雲車風馬來張弧擲刀作雨滿空際吐氣為火緣都盧  
豈知是鉢屹不動縱有藕孔難亡逋母慈淚等大海水  
五體投地稱南膜琉璃喉出微妙諦汝嗽人子無時無  
汝子五百盛種類云何結念徒區區羯肌王女過去是

不持戒故淪兇愚能於我法修淨業還汝大寶光明珠  
母喜禮足向調御本無有鉢攜其雛畫師何者善狡獪  
細意渲染為之圖人言可憎定不妄說鬼聊爾相歡娛  
書生亦有弘誓願願勿瀕海生虎貙

是日聞臺  
灣有寇警

五月晦日作

孤行但寂寂流光恒冉冉豈乏奔競途厠足畏嘲貶屋  
餘古人書高逸跡可檢食力慕徐穉通隱羨何點苦無  
上水田二者附亦忝歸來倏初暑荆扉白日掩耽此綠

陰閒養性惟以儉林風吹葛衣池影翻筠簟少焉西山  
雲屋角生有滄翼翼雨氣來沈沈夕陽歛向夜默無言  
草際孤螢閃

夏至前一日同少穆耕民汎湖

雨後看山綠繞城鏡袖初卷半湖明荷邊魚在香中戲  
橋上人從畫裏行料理酒杯無俗物銷除席帽足閒情  
水風忽送涼如許搖曳新蟬一兩聲

西湖竹枝詞三首

楊柳作花湖水香湖上樓高不見郎  
西山惱殺冷泉冷  
南山愛殺長橋長

新隄桃李能白紅畫船來往只湖中  
郎怕傷春復傷別  
儂怕愁水又愁風

儂住西村暮又朝摺盡畫帘金綫條  
女兒山頭新月上  
照儂自埽雙眉嬌

畫卧

妄心深雪盡教空長日闌門一枕中  
跂脚飛塵難我浣

支頤清夢許誰同  
黑驚燕子翻堦影  
涼受槐花灑地風  
慙媿夕陽如有意  
醒來每到小窗東

題文五峯蘭亭圖

江東禊事晉羣賢  
內史風流老筆傳  
水色曲如蘭上里  
山光青似永和年  
一亭雲日供觴詠  
四面松篁替管絃  
展卷好留陳迹在  
莫隨醉本散飛烟

七月十七夜對月時將之婺州

繩河斜影落風林  
獨掩柴關露氣深  
好月不嫌遲照坐



已涼何恨早攤衾事過唐肆空求馬跡類寒枝未穩禽  
為報東陽山水道安排烟翠待清吟

湖上秋陰同陳楞山符幼魯施竹田張東扶作

秋氣在蘭舫澹然諧素心蕭雲翳空水滅景墮遙岑欲  
寫尤難狀將留不可任絕憐歸渡晚踈蓼一叢深

晚發江干

落日挂帆去背人飛鵲鵲風烟秋半淨江水晚來波漁  
浦山爭出樟亭樹忽過尋源意飄蕩一聽越鄉歌

富春

富春縣前江勢奔危樓如畫俯山根  
林林人影向沙市  
葉葉風帆下海門  
秋入遙空無寸翳  
旱經焦土有千村  
田家正墮憂時淚  
安得新醅倒瓦盆

江行曉望

膠角遠村雞  
江行俄已旦  
推篷貪清景  
涼露半天散  
遠洲信逶迤  
盡處如玦斷  
連山聳蒼翠  
綠流競秀粲  
水際烟輕明  
忽抹山之半  
徐引青楓端  
漫靡不知岸  
阿那幾

幅帆日華相凌亂漁商互通語來去乘汎瀾微微遞遙  
鐘隱隱見樾館悟此趨向岐層波媚獨翫

夜泊桐廬

弭楫桐君山欲謁桐君祠桐君不可見月黑山參差是  
時秋江明遠近生寒漪村深犬吠客夜靜鵲繞枝卧聽  
戍角聲悲雜松風吹作客山水鄉塵土何由縉

七里瀨釣臺下作

山入嚴灘合沓遮灘聲盡日走雲沙禽魚不解留行客

金少卿詩集卷二  
鄉里惟聞重釣家  
嫋嫋涼風帆影轉  
層層僧舍竹光斜  
補脣晞髮詩魂在  
搜徧枯腸自煮茶

石塘洪阻淺

甘雨一旬愜秋水  
落涯涘舟喧積石  
橫月在行客起寒  
裳涉微流寒碧亦  
可喜寄謝嵩高人  
毋憂傷玉趾

望金華山出雲俄而大雨

齋心訪名山  
駕言入金華  
金華迢迢不可到  
但見翻風撼石樹  
色何槎枒  
籃輿徑穿城外去  
一桁遥青亂鋪絮

森然三十六洞天正在白雲離合處忽如饋餽炊乍濃  
又訝奔馬來何峯其間空涌墨翻汁俄頃變化隨飛龍  
不辨山巔沒山腹山與雲旋湮淋漓冰壺洞中水簾倒  
卷珠琲垂散作秋霖落雲族雲中髣髴懸霓旌神仙得  
者黃初平石羊叱作雨工起奮髯抵角跪且鳴噴灑林  
壑天瓢傾山邪雲邪兩奇絕衣溼松明還可蒸何當聽  
雨鹿田寺暗瀑吹窗燈暈結但願打鐘埽地老此山結  
屋青崖坐看雲生滅

自金華至永康道中作

筍輿懸度翠嶙峋連日看山態轉新  
礧仄泉疑翻白鷺雨深松欲化青人  
秋衾夢落前龕磬晚飯詩題破壁塵  
不是平生多遠意寂寥無侶恐傷神

永康懷古四首

方技用前民利在不詭俗趙侯善越方  
祕怪駭羣矚梧鼎爨屋茅張蓋坐溪綠  
徒嬰賢令法逸翮謝高躅吾欲毀其祠  
勿奏神絃曲

事見後漢書方技傳

穹龜大如笠不隨風雨飛有人入山去徒步擔之歸纜  
船夜著岸老桑灼禍機以諗諸葛恪物類感甚微析薪  
使其爛同盡知誰非弘覽既靡漏保身宜不違如何石

子岡蘆葦為單衣

事見吳均  
續齊諧記

天寶觀前松峨峨三千年一旦化為石礪礪節目堅匹

如託劍解識者惟神仙賞此松石意安得凌紫烟

事見  
沈汾

續仙  
傳

雲巖高參雲巉絕無與偶奇哉壑藏舟不可負之走舟

尾如蠶垂巨釘墜誰取野僧洗鐵花遂落孟兼手

張治

為剗犀刀佩以期不朽奈何非其人異物或為咎神鋒

忌太銛藏用古來有

事見徐尊  
生懷歸橐

將返武林留別張梁友先生

十日琴堂住天涼抱病歸偶游嗤索米臨別感傳衣社  
鼓聞茅店谿春隔竹扉心期還不負久薄世輕肥

九日同東扶游棲霞嶺諸蘭若六首

淨業菴



城中厭喧卑尋山事幽屏旁舍啟樹陰葉下秋更靜剎  
那悟塵緣香寒對僧影

白蓮菴

安禪最高巔南峯俯突兀蕭條白芙蕖池荒香不發微  
諦亦已忘疎磬散清樾

法螺菴

同游皆淨侶契此林下居翳翳半峯影空院生寒初迷  
方未云指塵跡遂來疎

帆菴

石路轉蒙龍何處尋梵放帆菴始知名高閣時可望竹  
風起夕陰蕭瑟難具狀

近溪菴

隔溪已延佇入門山幽幽暗泉不聞響窈然林壑秋何  
時期支公巾屨復茲游

嬾雲窩

殘陽在檐間空翠落如雨道人摧貢高留客嘗法乳向

夜依禪關惟有雲幾縷

東園

麋眼籬邊豆葉零機絲一半掩荒局舊游慣識東門菜

秋露秋風十里青

宋時東門絕無民居彌望皆菜園故土人有東門菜之諺見周必大二老

堂雜志至今俗猶然也

晚秋齋居

一夜霜風撼竹門年年秋事在邱樊貧憐圓菊仍分豔  
靜覺涼葢自減喧干世策堪黃口笑背時詩待素心論

中年不負蕭閒味落葉池邊釣石溫

試天目茶歌同蔣丈雪樵徐丈紫山作

陸鴻漸作陶偶人茶事往往傳失真四十三種列高下  
天目品與舒州鄰東西頂池湛雙鏡竒峯秀崿排青旻  
許邁宮連道陵宅靈根迸石無纖塵含滋雲霧灌泉脈  
抽芽一一留餘春山僧采焙趁穀雨紙囊箬裏封題新  
肉食貴人未知重例取武夷羅芥空紛綸雪樵子心似  
天目山頭兩泓水獨識茗柯有至理市隱近在吳山坊

坐我三腳之木牀空庭晝靜啼寒蟹為我手淪魚眼湯

須臾越盃發妙香微參鼻觀風悠颺名山秀液入肺腸

恍然置身天目頂青神鳳集樹下同相羊

李德裕平泉草木記木之

奇者天目之青神鳳集

雪樵子邀我與徐丈同作試茶之長歌兩

篇傳示句清語硬肩相摩我無筆力奈爾何天目茶可  
拍天目筍可挑安得茶筍佳時一赴山靈招勿使塵中  
立望空迢迢

臘月二十四日探梅孤山題壁

屈曲紅闌繞幾巡冷雲先作一分春梅花半樹倒臨水  
便與逋仙寫小身

人日雪

以下  
壬寅

巧將薄雪破春妍便有幽禽到酒邊料峭餘寒作人日  
寂寥情味逼中年梅花何處已堪折柳絮無端早放顛  
惡客不來塵事絕蒙頭乞我醉時眠

耕民齋中看梅

幾樹疑在水參差簾影空苔皴微冒雪花側半吹風間

思燈初落春懷酒正中妙香須管領况復與君同

題亦諳山人黃山圖

憶昔觀此圖南屏倚高閣松雲蕩心魂有句不能作  
冉七陽秋南北縛雙屨去年東阿城逢師瘦於鶴如聞  
化人心積蘇故可託停車通一語游戲除六鑿我歸師  
亦歸昨夢風掃籜塵纏最慚媿咫尺跡如削入春獨掩  
關窗疎遲景落此圖忽寄示逋句云當索舊觀已復還  
慰眼暫為樂似證飛行仙層層度林壑惟聞木蓮花香

氣滿寥廓真幻兩無住  
黃山被師攫借師畫中禪聊爾  
資嗚喙

清明日宗陽宮浴

昨雨今已霽朝旭開人眉  
不知此何日簷柳青垂枝徐  
步叩藥宮消搖忘所為道人憫塵垢伴我洒濯之宛頸

上善水

道家沐浴七盃一者  
上善水出雲笈七籤

如鳧拍漣漪宿滯散百脈

餘潤融三池起詠內景經  
勝食齋房芝風篁拂苔石肅  
肅靈簫吹被髮游物初老子吾其師



游龍井

惠遠住虎溪辨才住龍井坡老獨見訪送過風篁嶺亦  
如虎溪邊三笑趣自永遂令龍井名遠與虎溪併惜哉  
過溪亭跡滅蒼烟冷而我米斯游多年願力猛穿村拂  
女桑度磴落山杏何時毗嵐風吹墮石雲影

片雲石  
已仆安

得巨靈手重扶使之整寺門萬竹中脩脩翳光景幽雲  
擁殿角諸佛同一靜僧樸狀野鹿問事不復省導我窺  
井闌淺可勿用綆傳聞金鰻鯢或見游藻荇宜其青泥

蟠時出應祈請前年秋大雨水立勢欲騁神物終斂形

取足供瓢癭

是日僧所述如此

摩挲秦郎碑陳義臻奧境泉德

類有道片語默已領酌泉為裴回殘陽閃鵝頸羨彼樵  
牧流終身事幽屏

題金繪卣江聲草堂圖

時將入都

江聲主人江上住范村西去緣江路草堂髣髴木香村  
竹嶼依稀鐵爐步門前江色晴黏天屋角嵐霏晝搖樹  
柳絮著水魚正肥花片入簾燕新乳主人急裝將遠游

風光似此盍少留塵中知己苦寂寂鄒生枚突徒沈浮  
為言頻年役衣食人生誠字寧無憂有田十雙我將老  
息壤在彼盟諸鷗華君秋岳墨戲今倪瓚下筆烟雲互凌  
亂歸來舊徑在眼中隔浦低橋青不斷貧無送子雙玉  
餅展畫吟詩反覆看他時相約力著書釣石猶堪置柔  
翰

城東落花

富景園中萬樹斜深紅縈草淺縈沙今年病酒無人事

纔得工夫送落花

懷徐丈紫山客金陵二首

中秋過後重陽未澄碧天光裂葉風濁酒一杯歌一曲  
久無此興欠徐公

春分彈指又秋分記寫新詞篤耨熏今日秦淮歌板絕  
僧樓應夢馬湘君

今年春分同紫山  
賦綺羅香一闋

和蔣丈靜山九月八日登吳山

聞道城南載酒游清江如畫遠峯稠不愁紅葉明朝雨

先借黃花一日秋老去情懷無檢束興來風物即淹留  
登高難得鮮新句搔首真慙趙倚樓

題吳丈志上小像

我識石倉突長身比鶴癯青衫舊名士白髮老潛夫城  
市看花入溪山載筆俱襄陽習鑿齒著述近來無

吳丈近葺

武林耆舊集搜討最為該洽

東臯晚秋

東臯土間曠薄暮行蹤絕因思古隱者於焉衡宇結

元末

范思賢居錢塘城東地平衍有草木禽魚之樂賦近市詩鼓琴為娛自號東臯隱者見徐一夔始豐類稿

既無求浩歌氣彌烈令我懷斯人魚鳥轉親切脩脩林  
水間遺躅猶未滅得風枯條鳴將霜遠天潔悵矣不同  
時誰慰授衣節



樊榭山房集卷二